

SCRIPT OF EVENING GOJRI NEWS BULLETIN 27JUNE 1700 HRS

ایویننگ گو جری نیوز بلیٹن مورخہ 27 جون 2025

یوہ آکا شوانی جموں ہے گلام سرور تے نصرت تیں خبر سُنو۔

HEADLINES

۱. لیفٹیننٹ گورنر منوج سنہا نے کہیو کہ این سی سی نوجواناں غا ذہناں نانہ سوازن تے ملک غی خدمت غا جذبہ نانہ فروغ دین مانہ اہم کردار ادا کر رہی ہے۔
۲. لیفٹیننٹ گورنر منوج سنہا 2 جولائی نانہ شری امرناتھ جی یاترا غا پہلا جھٹا نانہ چھنڈی دس غے روانہ کریں غا۔
۳. صوبائی کمشنر جموں تے جموں غا انسپکٹر جنرل نے جموں صوبہ مانہ یاترا غا پُرامن انعقاد واسطے انتظامات غو جائیزو لیو۔
۴. ادھمپور غا بسنت گڈھ مانہ جیش محمد غا 3 دہشت گرداں نناہ مارمکان بارے تلاشی کاروائی جاری ہے۔
۵. پہلگام دہشت گردانہ حملہ غا ملزماں نانہ تحقیقات بارے قومی تحقیقاتی ایجنسی غی خصوصی عدالت مانہ پیش کیو گیو۔

LG NCC

لیفٹیننٹ گورنر منوج سنہا نے اج سرینگر مانہ منعقد سپیشل نیشنل انٹی گریشن کیمپ مانہ قومی این سی سی کیڈیٹ کور غی خدماتی تعریف کی اُنہاں ے کہیو کہ این سی سی نوجواناں غا ذہناں نانہ سوارن تے ملک غی خدمت غا جذبہ نانہ فروغ دین مانہ اہم کردار ادا کر رہی ہے۔ اُنہاں نے کیڈیٹ غی ہمت نظم و ضبط قیادت تے سماجی ترقی واسطے اُن غا عزم نانہ سہرايو ایل جی موصوف نے کہیو یوہ کیمپ ملک بھر غا نوجواناں نانہ جموں کشمیر غی بھر پور ثقافت تے روایت تیں قریب لیاں غو ایک منفرد موقعو ہے اس موقع ور گل کرتا واں لیفٹیننٹ موصوف نے اس طرہ کہیو۔

AMARNATH YATRA

سالانہ امرناتھ یاترا اگلے ہفتے شروع ہو رہی ہے اس سلسلہ مانہ یاتریاں گا پہلا جھٹہ نانہ 2 جولائی نانہ جموں تیں جھنڈی دس غے روانہ کیو جے گو صوبائی کمشنر رامیش کمار نے اس گل کی تصدیق کرتا واں کہیو کہ یاتریاں واسطے تمام تر انتظامات مکمل ہو چکا ہیں لیفٹیننٹ گورنر منوج سنہا بھگوتی نگر بیس کیمپ تیں یاتریاں نانہ جھنڈی دس غے روانہ کریں گا تاہم اس طرح امرناتھ گفا غا درشن گو سلسلو سخت حفاظتی کٹرہ بندی تے طبی سہولیتاں 3 جولائی تیں شروع ہو رہیو ہے تے 52 روز ور مشتمل یاہ یاترہ 19 اگست نانہ

اختتام پزیر ہو جے گی۔ایک پریس کانفرنس سنگ خطاب کرتا واں جموں غا صوبائی کمشنر نے اس طرح کہیو۔

RAMBAN SANJY

ضلع رام بن انتظامیہ کی طرفوں یاتریاں غا سفر نانہ محفوظ تے ہموار طریقہ کار سنگ بنان بارے تیاری کی جارہی ہے ضلعی انتظامیہ حفاظتی بندوبست آفت تیں نمڑن ضروری خدمات جس طرح ربن سہن صفائی ستھرائی تے صحت کی دیکھ ریکھ ور توجو دے رہیو ہے طبی محکمہ گے تحت متی تعداد مانہ طبی عملو تے ایمبولینس تعینات کی جارہی ہیں تمام صحت غا اداراں نانہ مکمل طورور کھل ارین تے خدمات انجام دین بارے ہدایت کاری کی گئی ہے تاہم اس طرح چیف میڈیکل افسر ڈاکٹر کمال جی زارو نے حال ہی مانہ صحت کی دیکھ ریکھ غا انتظامات غوجائیزو لی وتے ہدایت جاری کی کہ یاترا کی مدت روران فوری طبی رد عمل تے 24 گھنٹاں تیاری ور زور دتو اُن غو کہنو تھو۔

DIV COM IGP PILGRIMAGE

ڈویزنل کمشنر جموں رمیش کمار تے جموں پولیس غا انسپکٹر جنرل بھین سین توٹی نے جموں صوبہ غا مختلف ضلاع تیں شروع ہون آلی بڑی تے نکي یاتراں نانہ پرامن تے محفوظ انعقاد واسطے انتظامات بھیڑ ور قابو پاں تے طبی سہولیات غو معائینو کیو تانجے عقیدت مندان نانہ کسی وی قسم کی کائے پریشانی پیش نہ آئے حکام غو کہنو ہے کہ پولیس تے انتظامیہ غے درمیان بہتر رابطہ تے نگرانی تیں یاتریاں نانہ محفوظ سفر فراہم کیو جے غو۔

DHARTI AABA

جموں گا بسنیک دھرتی آنا غے تھت 15 روزہ میگا آئی ای سی مہم بارے اظہار تشکر کر رہیا ہیں جہیڑی اس وقت یوا ضلع مانہ جاری ہے ضلعی انتظامیہ کی طرفوں شروع کی گئی یاہ تقریب 6 بلاکس کی 16 پنچائیتاں مانہ منعقد کی جارہی ہے جس غو مقصد اہم سرکاری اسکیمیاں تے خدمتان بارے بیادری پیدا کرنو ہے ضلع میجسٹریٹ کی طرفوں کنہ برداریاں نانہ مضبوطی سنگ شرکت کی اطلاع دتی گئی ہے اس سلسلہ مانہ ہ شہریاں تے رسائی کی کوششاں نانہ سہرايو ہے تاہم اس طرح مہم آخری میل کی فراہمی نانہ یقینی بنان تے قبائلی آبادی غے نال براہ راست رابطہ غے ذریعے انتظام مانہ شفافیت نانہ فروغ دینبارے چلائی گئی ہے انتظامیہ غو اظہار تشکر کرتا واں گج لوکاں نے اس طرح کہیو۔

UDH OPERATION

ادھمپور ضلع غا بسنت گڑھ علاقہ مانہ ایک بڑی تلاشی کاروائی جاری ہے تانجے پاکستان تیں تعلق رکھن آلا جیش محمد غا ترے دہشتگرداں نانہ تلاش کیو جاسکے۔ فوج تے پولیس نے مشترکہ کاروائی اج سویرے دوراہ شروع کی جس مانہ ڈرون تے سوگن آلا گٹاں غی مدد لی جارہی ہے۔ مارا ضلع نمائندہ غے مطابق گزشتہ روز ٹاکرہ مانہ ماریا گیا دہشت گرد غو ناں

بیدر عرف مولوی تھو جس غو تعلق پاکستان تیں تھو حفاظتی دستاں نے علاقہ نانہہ کیرہ مانہہ لے ليو ہے تے تلاشی کاروائی جاری ہے جموں پولیس غا انسپکٹر جنرل بیم سین توٹی نے کاروائی غا بارہ مانہہ تازہ جانکاری دیتا واں اس طرح کہیو۔

NIA COURT

پہلگام دہشت گرد حملہ غا حالیہ واقع غا سلسلہمانہہ گرفتار ملزم پرویز احمد تے بشیر احمد نانہہ اج جموں مانہہ قومی تحقیقاتی یاجنسی غی خصوصی عدالت مانہہ پیش کیو گیو تانجے اُن غی ریمانڈ نانہہ بدھایو جاسکے کیونجے پہلی دتی گئی ۵ روزہ غی ریمانڈ اج ختم ہوگئی تھی۔ مارا نمائندہ انکش شرما غے مطابق حکام مکمل طورور چوکس ہیں تیاس حملہ غی تحقیقات جاری ہے تانجے تمام ذمے واراں نانہہ انصاف غا دائرہ مانہہ لایو جاسکے۔

KATHUA AIDS

ضلع کٹھوعہ گا محکمہ سماجی بہبود نے مصنوعی اعضا بنان آلا ادارہ غینال مل غے ایک پروگرام منعقد کیو جس مانہہ خصوصی افراد نانہہ امدادی سامان تقسیم کیا گیا تانجے اُن غی زندگی نانہہ بہتر بنایو جاسکے۔ ممبر اسمبلی ڈاکٹر بھارت بھوشن تے ضلع سماجی بہبود غا افسر وکر م سنگھ نے کٹھوعہ حلقہ غا مستحقین نانہہ 6سکوٹی 6ترے پھیاں آلی سائل سنن غی مشین تے چلن آلی سوٹی تقسیم کی۔ مستفیدان نے اس مدد ور کوشی غو اظہار کیو کیونجے یوہ سامان اُن غی خود مختاری مانہہ مددگار ثابت وے گو۔ اس موقع ور گل کرتا واں ممبر اسمبلی ڈاکٹر بھارت بھوشن نے اس طرح کہیو۔

DC JAMMU LABOUR DEP

ڈپٹی کشمنر سچن کمار ویشیا نے لیبر محکمہ گا کم کاج غو جائیزو لیو تے مزدوراں گا حقوق تے سماجی تھفٹ نانہہ یقینی بنان غی اہمیت ور زور دتو اُنہاں نے کہیو کہ مزدوراں گا قوانین ور سختی سنگ عمل ہونو چاہیے تے خاص طورور غیر منظم شعبہ غا مزدوراں نانہہ بروقت ور اندراج کیو جے ڈی سی نے افسراں نانہہ ہدایت کی کہ مزدوراں غی فلاح وبہبود تیں متعلق سکیمان نانہہ نچلی سطح توڑی موثر طریقہ سنگ پُجائیں تانجے مزدور طبقات نانہہ سہارو مل سکے اس جائیزہ غو مقصد محکمہ غا کماں نانہہ مزید موثر بنانو تے ضلع مانہہ مزدوراں گا حالات نانہہ بہتر بنانو ہے۔

DODA MULTI COMPLEX

شہری ترقی بارے ایک برو قدم چاتا واں ترقیاتی کمشنر دوڈہ برویندر سنگھ نے ڈوڈہ شہر مانہہ ملٹر سٹوری کارپارکنگ تے تجارتی کمپلیکس کی جاری تعمیر غو معائنو کیو اُنہاں نے اس منصوبہ نانہہ بروقت تکمیل تے معیار نانہہ برقرار رکھن ور زور دتو تاہم اس طرح اس سہولیت سنگ ٹریفک غا نظام نانہہ کھٹ کیو جاسکے غو جس مانہہ لگ بھگ 150 بساں

تے 250 کاراں گی پارکنگ گی گنجائش ہے تے اس سلسلہ مانہ ایک تجارتی سیکشن وی تیار
کیو جارہیو ہے جس سنگ مقامی کاروباری تے آمدنی پیدا کرن مانہ مدد وی لبے گی۔
